



26 Hereturikōkā 2021

Kua puta te karanga kia tāpaea mai he whakaaro mō te panoni ingoa wāhi i Fiordland

E karanga ana te New Zealand Geographic Board Ngā Pou Taunaha o Aotearoa kia tāpaea mai he whakaaro mō ngā tono kia panonitia ngā ingoa o ētahi ingoa wāhi e whitu i Fiordland, pērā i te taumata tiketike katoa o te Milford Track a Mackinnon Pass.

I raro i ngā tono, ka panonitia te tuhinga o Mackinnon Pass me Lake Mackinnon kia rite ai ki te tuhinga tika o Quintin McPherson McKinnon, te kairūri, te kaihōpara, te kaiārahi i taunahatia ai te wāhi ki a ia.

E rite ai ki te mahi a te Poari ki te kohikohi me te whakahau kia whakamahia te ingoa Māori taketake ake o tētahi wāhi, kua takoto te whakaaro kia tōrua te ingoa o te nonoti nei. Nō Te Rūnanga o Ngāi Tahu te whakaaro kia Omanui anō te ingoa, ko tōna tikanga ko 'te omanga nui' ko 'te rerenga nui rānei', e mōhiotia ai i kitea tuatahitia e te Māori.

Waihoki, ka nekehia te wāhi o ētahi ingoa maunga/tihi e whā me tētahi nonoti i te Pae Maunga o Darran ki ō rātou tūnga tika, ka whakatikaina anō te tuhia o ētahi wāhi e rua.

Kua tuwhera te whakawhitinga whakaaro mō ngā tono ingoa wāhi e whai ake nei:

Ingoa wāhi i tēnei wā	Momo tārainga whenua	Ingoa wāhi kua tonoa
Lake Mackinnon	Roto	Lake McKinnon
Mackinnon Pass	Nonoti	Omanui / McKinnon Pass
Wāhi hē	Maunga	Mount Milne
Wāhi hē	Maunga	Mount Tarewai
Wāhi hē me te hē o te tuhia kia Mount Mahere	Maunga	Mount Makere
Wāhi hē me te hē o te tuhia kia Waitiri	Keonga	Whaitiri
Parihaukea Pass [kei te wāhi hē]	Nonoti	Pikipari Pass

Hei tā Wendy Shaw, Hēkeretari o te Poari, "E kimi whakaaro ana te Poari i te tangata e hiahia ana ki te whakaputa i ōna whakaaro ahakoa tautoko, ahakoa whakahē rānei i ngā tono."

E whakaae ana te Poari kia tae ake ngā tāpaenga whakaaro mō ngā panonitanga i te Pae Maunga o Darran ki te 30 o Mahuru 2021, mō Lake Mckinnon me Omanui / Mckinnon Pass ki te 30 o Whiringa-ā-rangi 2021.

E wātea ana [ā-tuihono](#) ētahi atu kōrero mō tēnā me tēnā tono, me pēhea hoki te tuku whakaaro mai.

Waihoki, i oti i te Poari te [whakatau whakamutunga mō ētahi ingoa wāhi](#):

- [1 te ingoa wāhi i whakarerekētia](#)
- [204 ngā ingoa kua takoto kē mai i whakamanahia](#)
- [76 ngā whakahounga ngā whakatikatanga rānei](#)
- [5 ngā ingoa puni taua i unuhia.](#)

He wāhanga te nuinga o ngā ingoa wāhi nei o te hōtaka whakatau wawe a te Poari e whakaaehia ai kia mana te ingoa wāhi kua takoto kē mai. Ina mana te ingoa wāhi, me mātua whakamahi i te tānga e mana ana, i te tohu huarahi, te mahere, te pae tukutuku me te putunga raraunga.

Hei tā Ms Shaw, “E hira ana te āta whai kia pūmau, kia tiakina te ingoa wāhi kia mauroa ai, e āta mōhiohia ai tōna wāhi pū, tōna whāroa, tōna pūtakenga me tōna tūturutanga.”

I whakaū hoki te Poari kāore ōna mana ki te taunaha puni taua. Kei Te Ope Kātua o Aotearoa te kawenga ki te whakaingoa i ēnei.

KA MUTU

Mō ngā uinga pāpāho mō te New Zealand Geographic Board whakapā mai ki a media@linz.govt.nz me waea mai rānei ki 027 566 5251.

Kōrero tuaroa me ētahi atu kōrero

E wātea ana ētahi atu kōrero mō ngā tono ingoa e kōrerorerohia ana i: <https://www.linz.govt.nz/about-us/what-were-doing/consultation>

Ko Ngā Pou Taunaha o Aotearoa New Zealand Geographic Board te mana taunaha o te motu o Aotearoa, he mana ka toro ki ōna moutere o waho, ki tōna pūkawa raurarahi me te Ross Dependency o te Tiri o te Moana ki te Tonga. He rōpū motuhake ā-ture te NZGB e tautokohia ana e Toitū te Whenua.

He tohu hiranga te ingoa wāhi mō ngā kawenga o te ao hou, o te hītori, o te taha ahurea me ngā uara a ngā iwi nā rātou i taunaha. E hira ana hoki te mōhio ki te ingoa tika o tētahi wāhi me tōna wāhi pū mō ngā whakapāpātanga me ngā mahi o ia rā, pērā i te hiahia o ngā ratonga whawhati tata kia tere tautuhia tētahi wāhi i runga i te mārama me te tika.

Ka kitea ngā ingoa wāhi mana o Aotearoa i te [New Zealand Gazetteer](#).

Tukanga whakatau wawe:

Ko te ingoa wāhi kua takoto kē mai ko tētahi ka kitea i ētahi tānga, ētahi putunga raraunga rānei e rua neke atu e wātea tūmatanui ana, me te whakapono a te Poari e whai mana ana. Ka taea te whakaae kia mana te ingoa kua takoto kē mai me te kore e kimi whakaaro i te iwi tūmatanui. Ka kīia tēnei ko te tukanga whakatau wawe, kei raro i te wehenga 24 o te Ture o te New Zealand Geographic Board 2008.

E whai haere ana te Poari i ngā ingoa wāhi kua takoto kē i raro i tētahi hōtaka ā-rohe. Ki te whakahēngia tūmatanuitia tētahi ingoa wāhi kua takoto kē, me whai ko te tukanga ā-ture katoa e uru atu ai te kimi whakaaro i te iwi tūmatanui.

[Ētahi atu kōrero mō te hōtaka whakatau wawe](#)